

四庫全書

集部

欽定四庫全書

御定佩文齋詠物詩選卷二百三十七

仙觀類

五言古

和鮑常侍龍川館

梁元帝

珍臺接閨館迢遞山之旁
多解三真術俱善四明方
玉題書仙篆金榜燭神光
桂影侵檐進藤枝繞檻長
苔衣隨溜轉梅氣入風香

遊匡山簡寂館

陳張正見

三梁礪本絕千仞路猶通
即此神山內銀榜映仙宮
鏡似臨峰月流如飲澗
虹幽桂無斜影深松有勁風
惟當遠人望知在白雲中

和梁武陵王遙望道館

北周蕭撝

神境流精闕仙居紫翠房
今有尋真地迤邐麗通莊
九柱含虬重三臺飾夜光
金輝碧海桃玉笈紫書方
拂筵青鳥集吹簫白鳳翔
履歸堪是燕石在詎非羊
煙霞四

照蕊風月五名香於茲喜臨眺願得假霓裳

過藏矜道館

北周
王 褒

松古無年月鵠去復來歸石壁藤為路山窓雲作扉

至老子廟應詔

北周
庾 信

虛無推馭辨寥廓本乘蛻三門臨苦縣九井對靈谿盛
丹須竹節量藥用刀圭石似臨邛芋芝如封禪泥氈毛
新鵠小盤根古樹低野戍孤煙起春山百鳥啼路有三
千別途經七聖迷唯當別闕吏直向流沙西

入道士館

庾信

金華開八景玉洞上三危雲袍白鶴度風管鳳凰吹野
衣縫蕙葉山中蓼筍皮何必淮南館淹留攀桂枝

遊清都觀尋沈道士

唐
凌敬

聊排靈瑣闥徐步入清都青谿冥寂士思玄徇道樞十
芒生藥笥七炁發丹爐縹緲桐君錄朱書王母符宮槐
散綠穗日槿落青柎矯去龍門鶴飛來葉縣鳧凌風自
可御安事迫中區方追羽衣侶從此得玄珠

遊清都觀尋沈道士得清字

唐許敬宗

幽人蹈箕穎方士訪蓬瀛
豈若逢真氣齊契體無名
既詮衆妙理聊暢遠遊情
縱心馳貝闕怡神想玉京
或命餘杭酒時聽洛濱
笙風衝通閭苑星使下層城
蕙帳晨飈動芝房夕露清
方叶棲遲趣於此聽鐘聲

秋日仙遊觀贈道士

唐王勃

石圖分帝宇銀牒洞靈宮
迴丹紫岫室複翠上巖櫳
霧濃金竈靜雲暗玉壇空
野花常捧露山葉自吟風
林泉

明月在詩酒故人同待余逢石髓從爾命飛鴻

遊清都觀尋沈道士得仙宇

唐 劉孝孫

紛吾因暇豫行樂極留連尋真謁紫府披霧覲青天
緬懷金闕外遐想玉京前飛軒俯松柏抗殿接雲煙
滔滔清夏景嘒嘒早秋蟬橫琴對危石酌醴臨寒泉
聊祛塵俗累寧希龜鶴年無勞生羽翼自可狎神仙

至嵩陽觀

唐 儲光義

真人上清室乃在中峰前花霧生玉井霓裳畫列仙念

茲宮故宇多此地新泉松柏有清陰
薜蘿亦自妍一聞步虛子又話逍遙
篇忽若在雲漢風中意泠然

述降聖觀

儲光羲

一山盡天苑一峰開道宮
道花飛羽衛天鳥游雲空
玉殿俯玄水春旗搖素風
夾門小松柏覆井新梧桐
自昔太仙下乃知元化功
神皇作桂館此意與天通

題應聖觀

儲光羲

空中望小山山下見餘雪
皎皎河漢女在茲養真骨
登

門駭天書啟籥問仙訣池光搖水霧燈色連松月合埽
起花臺折草成玉節天雞弄白羽王母垂玄髮北有上
年宮一路在雲霓上心方嚮道時復朝金闕

昭聖觀

儲光羲

主家隱谿口微路入花源數日朝青閣彩雲猶在門雙
樓夾一殿玉女侍丹元扶檉盡蟠木步櫚多畫幡新松
引天籟小柏繞山樊坐弄竹陰遠行隨谿水喧石池辨
春色林獸知人言未逐鳳凰去真宮在此原

宿天台桐柏觀

唐 孟浩然

海行信風帆夕宿逗雲島
緬尋滄洲趣近愛赤城好
捫蘿亦踐苔輟棹恣窮討
息陰憩桐柏采秀尋芝艸
鶴唳清露垂雞鳴信潮早
願言解纓紱從此去煩惱
高步陵四明元蹤得三老
紛吾遠遊意學彼長生道
日夕望三山雲濤空浩浩

自紫陽觀至華陽洞宿侯尊師草堂簡同遊李

延年

唐 劉長卿

石門媚煙景，句曲盤江甸。南向佳氣濃，數峰遙隱見。漸
臨華陽口，雲路入蔥蒨。七曜懸洞宮，五雲抱仙殿。銀函
竟誰發，金液徒堪薦。千載空桃花，秦人深不見。東谿喜
相遇，貞白如會面。青鳥來去閒，紅霞朝夕變。一從換仙
骨，萬里乘飛電。蘿月延步虛，松花醉閒宴。幽人即長往，
茂宰應交戰。明發歸琴堂，知君懶為縣。

宿簡寂觀

唐

白居易

巖白雲尚屯，林紅葉初隕。秋光引閒步，不知身遠近。夕

投靈洞宿卧覺塵機泯名利心既忘市朝夢亦盡暫來
尚如此况乃終身隱何以療夜飢一匙雲母粉

遊華山雲臺觀

唐孟郊

華嶽獨靈異草木恒新鮮山盡五色石水無一色泉仙
酒不醉人仙芝皆延年夜聞明星館時韻女蘿絃敬茲
不能寐焚柏吟道篇

西上經靈寶觀

孟郊

道士無白髮語音靈泉清青松多壽色白石恒夜明放

步霽霞起振衣華風生真文祕中頂寶氣浮四楹一片
古關路萬里今人行上仙不可見驅策徒西征

上真觀

唐
陸龜蒙

嘗聞昇三清真有上中下官居乘佩服一一自相亞霄
裙或霞縈侍女忽玉妃坐進金碧映去馳颺歛駕今來
上真觀恍若心靈訝祗恐暫神遊又疑新羽化風餘撼
朱草雲破生瑤榭望極覺波平行虛信煙藉閒開飛龜
帙靜倚宿鳳架俗狀既能遺塵冠聊以卸人間方大火

此境無朱夏松蓋蔭日車泉紳拖天罅窮幽不知倦復
息芝園舍鏘珮引涼姿焚香禮遙夜無情走聲利有志
依閒暇何處好迎僧希將石樓借

冬日天目西峰張鍊師所居

唐僧皎然

採薪逢野泉漸見棲閑所坎坎山上聲幽幽林中語仙
卿何代隱鄉服言亦楚開水洗藥苗掃雪候山侶零葉
聚敗籬幽花積寒渚冥冥孤鶴性天外思輕舉

青城山丈人觀

宋文同

羣峰垂碧光下擁岷仙家神皇被金巾坐領五帝銜威
靈攝真境俗語不敢譁精心叩殊庭俯首仰紫華願言
鳳羅盟畢世驅塵邪循奉蕊珠戒期之飛太霞

天倉山威儀觀

文同

羣峰削瓊瑤老蘚抹古綠應朝大岷去簪笏儼相逐珠
宮秘仙仗錦笈藏寶籙上帝此為倉其田堪種玉

宿武夷觀妙堂

宋朱子

陰靄除已盡山深夜還冷獨卧一齋空不眠思耿耿閒

來生道心妄遣慕真境稽首仰高靈塵緣誓當屏

其二

清晨叩高殿緩步遶虛廊齋心啟真秘焚香散十方出
門戀仙境仰首雲峰蒼躊躇野水際頓將塵慮忘

大滌洞天

宋林景熙

九鎖絕人寰一嶂聳天柱自從開闢來著此洞千古奇
石千萬姿元不費神斧帝敕守六丁山夔孰敢侮白晝
中冥冥遊者必持炬或絢若霞敷或蹙若波詭或豎若

旌幢或懸若鐘鼓或虎而爪踞或鳳而翅舞異狀紛獻
酬清音起擊拊不知金堂仙恍惚在何許褰衣下側逕
層嵐結瓊乳逕極罅轉深幽潭蓄風雨劣容童豎入恐
觸蛟龍怒凜乎不可留長嘯出巖戶

金華觀

元

吳師道

春晏踐宿期雲間陟高岑獲從勝友俱遂此物外心月
窟探萬仞臨淵測重陰盤坐白石臺長嘯青櫟林莫探
虛皇居急雨含蕭森松風飛淙合終夜淒笙琴何能發

孤詠千載同遺音

瓊林臺為薛元卿賦

元甘立

西山有崇臺上與雲氣通仙人紫霞佩導以雙青童逍
遙琪樹林盤礴瑤華宮積石象縣圃連岑構空同纒纒
駐朝景泠泠度天風丹鳳刷儀羽絳節飄瞳矐矯首不
可及滅沒凌飛鴻願言授靈藥與世無終窮

毛公壇

明高啟

欲觀漢壇符東上縹緲峰葛花墮寒露夕飲清心胸月

出太湖水鶴鳴空澗松真境久寂寥蒼苔閱靈蹤嘗聞
綠毛叟變化猶神龍世人豈得見偶許樵夫逢攀陰力
易疲探元志難從歸出白雲外空聞仙觀鐘

初夏過寧真道院

明楊基

偶來高樹下獨坐青苔石澗雨落餘霏衣裳淡生碧道
因微物悟理向玄言析習靜自無營何妨處囂寂

春日遊真常觀

明楊訓文

携琴偶獨來尋幽入芳樹林深鳥聲寂坐久淡忘慮振

衣下崇岡斜陽在歸路

七言古

宿無為觀

唐元結

九疑山深幾千里峰谷崎嶇人不到
山中舊有仙姥家
十里飛泉遠丹竈如今道士三四人
茹芝鍊玉學輕身
霓裳羽蓋傍臨壑飄飄似欲來雲鶴

題醴陵玉仙觀歌

唐僧護國

玉喬一去空仙觀白雲至今凝不散
星垣松殿幾千秋

往往笙歌下天半瀑布西行過石橋黃精採根還採苗
路逢一人擎藥椀松花夜雨風吹滿又言家住在東坡
白犬相隨邀我過南山石上有碁局曾使樵夫爛斧柯

毛公壇福地

宋 范成大

松蘿滴翠白晝陰七十二峰中最深綠毛仙翁已仙去
惟有石壇留竹塢竹陰掃壇石槎牙漢時風雨生蘚花
山中笙鶴尚遺響湖外人煙驚歲華道人眸子照秋色
邀我分山築丹室驅丁役甲莫兒嬉渴飲隱泉飢餌朮

七真山洞雲觀

元程鉅夫

七真之山白雲裏絳闕神宮半空起
祁君有志于君成更賜雄材自天子
東臨滄海西崑崙森森翠節排天門
三更日射芙蓉色六月石挂水霜痕
山頭髣髴清虛府洞底陰岑太行路
青苔能識六龍車明月長懸萬年樹
峰盤澗複氣縕縕瑶艸金芝日日新
若王自有長生藥端拱無為萬國春

遊吳山紫陽菴

元薩都拉

天風吹我登鼇峰
大山小山石玲瓏
赤霞日烘紫瑪瑙
白露夜滴青芙蓉
飄緜雲起穿石屋
石上涼風吹紫竹
挂冠何日賦歸來
煮茗篝燈洞中宿

鶴林詩

明 劉 剛

鶴林羽士金門客
舊闢丹房煉瓊液
手栽千樹虬髯松
坐對兩山虎頭石
白雲晝靜豁巖扉
濕翠滿堦生紫芝
瑤琴自奏澗湍響
銀河直掛瀑泉飛
鼎爐存火烹鉛汞
靈藥成苗幾時種
皓鶴翎梳雪鬢林
碧桃花落霞飄洞

琳宮蕊闕想蓬萊
疊嶂連峰紫翠堆
丹光穿壁如紅日
應有仙人騎鶴來

分得九仙觀送劉司務之天官

明趙迪

青山一逕連花竹
瑤宮瑤館依林麓
昔云兄弟九仙人
跨鯉成仙巖下宿
仙人一去竟不來
落葉行跡空蒼苔
石窓無人白雲冷
藥爐有火芙蓉開
春林不辨武陵處
陰崖尚憶瑤池路
仙樂時聞太乙宮
翠禽聲起勾陳樹

鴉浴池邊日未斜
洞門流水秦人家
湖光占處知殘雨
山色晴中見落花
朝來送君即傾蓋
離筵適與羣仙會
仙人吹笙期子來
碧桃花下應相待

五言律

遊靈公觀

唐駱賓王

靈峰標勝境
神府枕通川
玉殿斜連漢
金堂迥架煙
斷風疎晚竹
流水切寒絃
別有青門外
空懷縣圃仙

嶽館

唐沈佺期

洞壑仙人館孤峰玉女臺空濛朝氣合窈窕夕陽開流
澗含輕雨虛巖應薄雷正逢鸞與鶴歌舞出天來

辛白鹿觀應制

沈佺期

紫鳳真人府斑龍太上家天流芝蓋下山轉桂旂斜聖
藻垂寒露仙杯落晚霞惟應問王母桃作幾時花

辛白鹿觀應制

唐
李嶠

駐蹕三天路迴旃萬仞谿真庭羣帝饗洞府百靈棲玉
酒仙壚出金方暗壁題佇看青鳥入還陟紫雲梯

辛白鹿觀應制

唐蘇頌

碧虛清吹下藹藹入仙宮
松磴攀雲絕花源接澗空
受符邀羽使傳訣駐香童
詎似閒居日徒聞有順風

辛白鹿觀應制

唐崔湜

御旗探紫籙仙仗闕丹丘
捧藥芝童下焚香桂女留鸞
歌無歲月鶴語記春秋
臣朔真何幸常陪漢武遊

辛白鹿觀應制

唐徐彥伯

鳳輿乘八景龜籙向三仙
日月移平地雲霞綴小天
金

童擊紫藥玉女獻青蓮
花洞留宸賞還旗統夕煙

辛白鹿觀應制

唐李乂

制蹕乘驪阜迴輿指鳳京
南山四皓謁西岳兩童迎
雲幄臨縣圃霞杯薦赤城
神明近茲地何事往蓬瀛

奉和辛白鹿觀應制

唐武平一

玉府凌三曜金壇駐六龍
綵旒懸倒景羽蓋偃喬松
縣圃靈芝秀華池瑞液濃
謬因霄舜渥長願奉堯封

春日登金華觀

唐陳子昂

白玉仙臺古丹丘別望遙山川亂雲日樓榭入煙霄鶴
舞千年樹虹飛百尺橋還逢赤松子天路坐相邀

過方尊師院

唐
蔡母潛

羽客北山尋艸堂松逕深養神宗示法得道不知心洞
戶逢雙履寥天有一琴更登玄圃上仍種杏成林

尋雍尊師隱居

唐
李白

羣峭碧摩天逍遙不記年撥雲尋古道倚樹聽流泉花
暖青牛卧松高白鶴眠語來江色暮獨自下寒煙

清明日宴梅道士房

唐 孟浩然

林卧愁春盡，
餐帷攬物華。
忽逢青鳥使，
邀入赤松家。
金竈初開火，
仙桃正發花。
童顏若可駐，
何惜醉流霞。

遊精思觀題山房

孟浩然

誤入桃源裏，
初憐竹徑深。
方知仙子宅，
未有世人尋。
舞鶴過閒砌，
飛猿嘯密林。
漸通玄妙理，
深得坐忘心。

玉臺觀

唐 杜甫

浩劫因王造，
平臺訪古遊。
綵雲簫史駐，
文字魯恭留。
宮

闕通羣帝乾坤到十洲人傳有笙鶴時過北山頭

苑外至龍興院作

唐 儲光義

朝遊天苑外忽見法筵開山勢當空出雲陰滿地來
踈鐘清月殿幽梵靜花臺日暮香林下飄飄仙步迴

奉和華清宮觀行香應制

唐 崔國輔

天子藻珠宮樓臺碧落通豫遊皆汗漫齋處即崆峒雲
物三光裏君臣一氣中道言何所說寶歷自無窮

開元觀遇張侍御

唐 錢起

碧落忘歸處佳期不厭逢晚涼生玉井新暑避煙松欲
醉流霞酌還醒度竹鐘更憐琪樹下歷歷見遙峰

過包尊師山院

唐
劉長卿

賣藥曾相識吹簫此復聞杏花誰是主桂樹獨留君漱
玉臨丹井圍棋訪白雲道經今為寫不慮惜鷺羣

宿洞靈觀

唐
皇甫冉

孤煙靈洞遠積雪滿山寒松柏凌高殿莓苔封古壇客
來清夜久仙去白雲殘明日開金籙焚香更沐蘭

雲陽觀寄袁稠

唐李端

花洞晚陰陰
仙壇隔杏林
漱泉春谷冷
搗藥夜窓深
石上開仙酌
松間對玉琴
戴家谿北住
雪後去相尋

不食仙姑山房

唐張籍

寂寂花枝裏
草堂惟素琴
因山曾改眼
見客不言心
月出谿路靜
鶴鳴雲樹深
丹砂如可學
便欲住幽林

同蕭鍊師宿太一廟

唐李益

微月空山曙
春祠謁少君
落花壇上拂
流水洞中聞
酒

引芝童奠香餘桂子焚鶴飛將羽節遙向赤城分

遊天柱觀

唐
李郢

聽鐘到靈觀仙子喜相尋茅洞幾千載水聲寒至今讀
碑丹井上坐石澗亭陰清興未云盡煙霞生夕林

遊玉芝觀

唐
李羣玉

尋仙向玉清獨倚雪初晴木落寒郊迥煙開疊嶂明片
雲盤鶴影孤磬雜松聲且共探玄理歸途月未生

玉芝觀

唐
周賀

四面山蘿合空堂畫老仙
蠹根停雪水曲角積茶煙
道至心機盡宵清琴韻全
暫來還又去未得坐經年

謁仙觀

唐馬戴

我生求羽化齋沐造仙居
葛蔓沒丹井石函盛道書
寒松多偃側靈洞徧清虛
一就泉西飲雲中採藥蔬

其二

山空蕙氣香乳管出雲房
願值壺中客親傳肘後方
三更禮星斗寸七服丹霜
默坐樹陰下仙經橫石牀

同莊秀才宿鎮星觀

馬戴

的的星河落露苔
復灑松濕光微泛
草石翠淡搖峰野
觀雲和月秋城漏
間鐘知君親此境
九陌少相逢

宿陽臺觀

馬戴

玉洞仙何在
爐香客自焚
醮壇圍古木
石磬響寒雲
曙月孤霞映
懸流峭壁分
心知人世隔
坐與鶴為羣

終南白鶴觀

唐鄭谷

步步景通真
門前衆水分
檉蘿諸洞合
鐘磬上清聞
古

木千尋雪寒山萬丈雲終期掃壇級來事紫陽君

寄李校書遊簡寂觀

唐黃滔

古觀雲谿上孤懷永夜中梧桐四更雨山水一庭風詩
得如何句仙遊最勝宮却愁逢羽客相與入煙空

題許仙師院

唐韋莊

地古多喬木遊人到且吟院開金鎖濕門映綠篁深山
色不離眼鶴聲長在琴往來誰與熟乳鹿住前林

同僧宿道者院

唐李洞

携文過水宿拂席四廊塵陸果敲樓瓦高螢映鶴身點
燈吹葉火談佛悟山人盡有棲霞志好謀三教鄰

靈谿觀

唐

劉昭禹

鼇海西邊地宵吟景象寬雲開孤月上瀑噴一山寒人
異髮常綠草靈秋不乾無由此棲息魂夢在長安

宿玉簫宮

唐

儲嗣宗

塵飛不到空露濕翠微宮鶴影石橋月簫聲松殿風綠
毛辭世女白髮入壺翁借問燒丹處桃花幾徧紅

宿天柱觀

唐僧靈一

石室初投宿仙翁幸見容
花源隨水見洞府過山逢泉
湧階前地雲生戶外峰中宵
自入定非是欲降龍

和明道人宿山寺

宋徐鉉

聞道經行處山前與水陽
磬聲深小院燈影迴高房
落宿依樓角歸雲擁殿廊
羨師閒未得早起逐班行

晚憩白鶴廟寄句容張少府

徐鉉

日入林初靜山空暑更寒
泉鳴細巖竇鶴唳眇雲端
拂

榻安碁局焚香戴道冠望君如不見終夕凭闌干

題鶴鳴化上清宮

宋文同

秘宇壓孱顏飛梯上屈盤清流抱山合喬木夾雲寒地
古芝英拆巖秋石乳乾飈輪游底處空自立層壇

棲霞觀觀在麻嶺之下

宋孫覲

雲表朝飛屐松殘晚駐鞍破扉連白板槁項繫黃冠徑
雨喧風攆汀沙立露翰小窓牀坐好對此百憂寬

延禧觀

宋趙師秀

寂寞古仙宮松林常有風鶴毛蕪葉下井氣與雲同背
日苔磚紫多年粉壁紅相傳陶縣令曾住此山中

題信州先天觀圖

元楊載

四圍山不斷狀若碧芙蓉谷遠含風細崖深下露濃茂
林藏虎豹陰洞伏蛟龍恍惚神人降浮空羽蓋重

題先天觀圖

元揭傒斯

聞說先天觀重重絕壁環鳥啼青嶂裏花落白雲間樵
子能長嘯居人識大還洞門無處認惟有水潺湲

玉虛宮

元 納 延

樓觀迴深巷松枝夾路低
拾薪供早爨抱甕灌春畦
經向琅函讀詩從古鼎題
白鬚張道士送客過桃谿

雲谿真觀

元 雅 勒 呼

真館雲谿上孤高逼太清
江山環几席星斗拂檐楹
樹古成龍去篁疎作鳳鳴
仙遊始可接我欲謝塵纓

與索編修士巖訪馬學士伯庸於蓬萊館因觀

藤花

元 黃 清 老

昔訪蓬萊館春烹芍藥芽重來尋竹逕久坐落藤花君
欲鳴瑤瑟予將拾紫霞鶴吟知雨近留宿白雲家

寄題林慮山趙鍊師精舍

明朱程堯

壺闕跨天黨中有地仙鄉曲磴懸星斗危峰度石梁泉
聲當戶落藥氣入雲香何日同真隱來尋出世方

尋天台李道士齋

明周忱

瑤草迷行逕丹臺近赤城山川遙在望雞犬不聞聲谷
靜松花落橋橫澗水鳴雲間雙鶴下疑聽紫鸞笙

夏日遊道觀

明薛蕙

隔竹窺丹洞
臨池坐碧沙
翠盃寒玉水
石盃淨雲芽
展簾來風色
吹笙上月華
休論河朔飲
詎似醉流霞

元真觀

明皇甫濂

列館成恬曠
垂軒坐息機
未須人境遠
已覺世塵違
釣密秋生院
花殘日背扉
誰將示冲漠
予意正忘歸

五言排律

為趙法師別造精院過院賦詩

唐
明 皇

宗師心物外為道運虛舟不戀巖泉賞來從宮禁遊探
元知幾歲習靜更宜秋煙樹辨朝色風湍聞夜流坐朝
繁聽覽尋勝在清幽欲廣無為化因茲庶可求

和劉侍郎入隆唐觀

唐
楊 炯

福地陰陽合仙都日月開山川臨四險城樹隱三臺伏
檻排雲出飛軒遶澗迴參差凌倒影瀟灑軼浮埃百果
珠為寶羣峰錦作苔懸蘿暗凝霧瀑布響成雷方士燒

丹液真人泛玉杯
還如問桃水更似得蓬萊
漢帝求仙日相如作賦才
自然金石奏何必上天台

和輔先入昊天觀

楊炯

遁甲爰皇里星占太乙
宮天門開奕奕佳氣鬱
葱葱碧落三乾外黃圖
四海中邑居環若水城
闕抵新豐玉檻崑崙側
金樞地軸東上真朝北
斗元始詠南風漢后祠
五帝淮王禮八公道書
編竹簡靈液灌梧桐艸
茂瓊階綠花繁寶樹紅
石樓紛似畫地境森如
空桑海年應積

桃源路不窮黃軒若有問三月住崆峒

晚秋陪崔閣老張秘監苗考功同遊昊天觀

唐
權德輿

方駕遊何許仙源去似歸縈迴留勝賞瀟灑出塵機
汎菊賢人至燒丹姹女飛步虛清晚籟隱几吸晨暉
竹逕琅玕合芝田沆瀣晞銀鈎三洞宇瑤笥六銖衣
麗句翻紅藥佳期限紫薇徒然一相望郢曲和應稀

聖真觀劉真師院十韻

唐
羅隱

簾下嚴君卦窓間少室峰攝生門已盡混跡世猶逢山
藪師王烈簪纓友戴顓魚挑介象鱸飯吐菖玄蜂紫飽
垂新椹黃輕墮小松塵埃金谷路樓閣上陽鐘野鶴鳶
肩寄仙書鳥爪封支牀龜縱老取箭鶴何慵別久曾牽
念閒來肯厭重尚餘青竹在試為剪成龍

題何仙人大隱閣

宋

蔡襄

萬井連交道中天敞靜軒由來隱鄜市全勝賁丘園目
極無留賞心閒不避喧洎光搖屋動花艷出欄繁雨霽

山容靜潮生海氣昏幽人披彩檻永日對芳樽素業名家久通醫與義存丹圖環八卦仙訣遁三元造化今為友歡欣本聚門應須超世累宴坐此忘言

七言律

玉臺觀

唐
杜
甫

中天積翠玉臺遙上帝高居絳節朝遂有馮夷來擊鼓始知羸女善吹簫江光隱見龜鼉窟石勢參差烏鵲橋更有紅顏生羽翰便應黃髮老漁樵

題茅山李尊師山居

唐秦系

天師百歲少如童不到山中竟不逢
洗藥每臨新瀑水步虛時上最高峰
籬間五月留殘雪石上千年蔭怪松
此去人寰今遠近回看雲壑一重重

同遊仙遊觀

唐韓翃

仙臺初見五城樓風物淒清宿雨收
山色遙連秦樹晚砧聲近報漢宮秋
疎松影落空壇靜細草春香小洞幽
何用別尋方外去人間亦自有丹丘

延平天慶觀

唐王初

劍化江邊綠構新層臺不染玉梯塵千章隱篆標龍閣
一曲空歌降鳳鈞嵐氣濕衣雲葉曉天香飄戶月枝春
盟金早晚聞仙語學種三芝伴羽人

宿題天壇觀

唐劉滄

沐髮清齋宿洞宮桂花松韻滿巖風紫霞曉色秋山霽
碧落寒光霜月空華表鶴聲天外迴蓬萊仙界海門通
冥心一悟虛無理寂寞玄珠象罔中

再遊姑蘇玉芝觀

唐許渾

高梧一葉下秋初
迢遞重廊舊寄居
月過碧窓今夜酒
雨昏紅壁去年書
玉池露冷芙蓉淺
瓊樹風高薜荔疎
從此扁舟更東去
仙翁應笑為鱸魚

題青城山范賢觀

唐球

數里緣山不厭難
為尋真訣問黃冠
苔鋪翠點仙橋滑
松織香梢古道寒
晝傍綠畦嫵嫩玉
夜開紅竈熬新丹
鐘聲已斷泉聲在
風動瑤花月滿壇

四月十五道室書事寄襲美

唐陸龜蒙

烏飯新炊芼臠香
道家齋日以為常
月苗杯舉存三洞
雲蕊函開叩九章
一掬陽泉堪作雨
數銖秋石欲成霜
可中值著雷平信
為覓閒眠苦竹牀

和四月十五日道室書事

唐皮日休

望朝齋戒是尋常
靜啟金根第幾章
竹葉飲為甘露色
蓮花鮓作肉芝香
松膏背日凝雲磴
丹粉經年染石牀
刺欲與君同此志
頑仙惟恐鬢成霜

寄題玉霄峰葉涵象尊師所居 皮日休

青冥向上玉霄峰
元始先生戴紫蓉
曉案瓊文光洞壑
夜壇香氣惹杉松
閒迎仙客來為鶴
靜嘆靈符去是龍
仔細捫心無偃骨
欲隨師去肯相容

寄題羅浮軒轅先生所居 皮日休

亂峰四百三十二
欲問徵君何處尋
紅翠數聲瑤室響
真檀一炷石樓深
山都遣負沽來酒
樵客容看化後金
從此謁師知不遠
求官先有葛洪心

寄題鏡巖周尊師所居

皮日休

八十餘年住鏡巖，鹿皮巾下雪髟髟。
牀寒不奈雲縈枕，經潤何妨乳滴函。
飲澗猿迴窺絕洞，緣梯人歇倚危杉。
如何計吏窮於鳥，欲望仙都一舉帆。

題龍瑞觀兼呈徐尊師

唐方干

或雨或雲常不定，地靈雲雨自無時。
世人莫識神方字，仙鳥偏棲藥樹枝。
遠壑度年如晦暝，陰谿入夜有凌澌。
此中唯有師知我，未得尋師即夢師。

登昇元閣

唐
李建勳

登高始覺太虛寬
白雪須知唱和難
雲度瑣窓金榜濕
月移珠箔水精寒
九天星象簾前見
六代城池直下觀
唯有上層人未到
金烏飛過拂闌干

桐柏觀

唐
周朴

東南一境清心目
有此千峰插翠微
人在下方衝月上
鶴從高處破煙飛
巖深水落寒侵骨
門靜花開色照衣
欲識蓬萊今便是
更於何處學忘機

安國寺隨駕幸興唐觀應制

唐僧廣宣

東林何殿是西鄰
禪客垣牆接羽人
萬乘遊仙宗有道
三車引路本無塵
初傳寶訣長生術
已證金剛不壞身
兩地同修天上事
共瞻鸞鶴重來巡

題紫陽觀

宋徐鉉

南朝名士富仙才
追步東鄉遂不迴
丹井自深桐暗老
祠宮長在鶴頻來
巖邊桂樹攀仍倚
洞口桃花落復開
惆悵霓裳太平事
一函真跡鍊昭臺

留題延生觀後山上小堂

宋蘇軾

谿山愈好意無厭，上到巉巖第幾尖。
深谷野禽毛羽怪，上方仙子鬚眉纖。
不慚弄玉騎丹鳳，應逐嫦娥駕老蟾。
澗艸巖花自無主，晚來蝴蝶入疎簾。

遊龍瑞宮次程公韻

宋秦觀

靈祠真館闕山隈，形勢相高對越臺。
莓徑翠依屏上轉，藕花紅繞鑑中開。
鶴銜寶箭排煙去，龍護金書帶雨來。
夾道萬星攢騎火，滿城爭看使君迴。

青城山會慶建福宮

宋 范成大

墨詔東來洵驛傳璇題金榜照山川祥開聖代千秋節
響動仙都九室天觸石湧雲埋紫邏流金飛火燭蒼巔
祇應老宅龐眉客長記新宮錫號年

孫真人庵

范成大

何處仙翁舊隱居青蓮巉絕似蓬壺雲深未到洵朱洞
雨小先尋煉藥爐澗下艸香疑可餌林間虎伏試教呼
閒身儘辦供薪水定肯分山一半無

題東山道院

宋 徐 璣

古院嵌嵌石作層綠苔芳艸近郊垞谿流偶到門前合
山色偏來竹裏青靜與黃蜂通戶牖閒將白鳥共沙汀
道人亦有能琴者一曲清徽最可聽

紫澤觀

宋 劉克莊

修持盡是女黃冠自小辭家學住山簾影靜垂斜日裏
磬聲徐出落花間祭星綠簡親書字避客青衣密掩關
最愛粉牆堪試筆苦無才思又空還

玉清宮與趙達夫鮮于樞聯句

元白珉

巾子峰頭樣釣船

達夫

初陽臺上坐鳴絃出雲高樹明殘

日

珉

過雨蒼苔泣細泉絕俗誰能繼遐躅

樞

凌空我欲

學飛仙

達夫

還家正恐鄉人問

珉

化鶴重來知幾年

樞

宿曲陽仙館

元薩都拉

天際三峰橫紫煙山前山後盡芝田樓臺木末疑無路
雞犬雲中半是仙白石經年皆化玉青松盡日只聞泉

曲林三館幽深處一夜重樓聽雨眠

同吳郎飲道院

薩都拉

三月江南飛柳花松間童子臉如霞旋酤采石仙人酒
來訪山陰道士家落日下城人影散東風吹馬帽檐斜
吳郎今夜孤舟渡回首江心月半沙

遊清谿道院

薩都拉

舊遊淮水東邊月高照昇龍道士家丹竈火光穿樹木
石壇幡影走龍蛇蝦鬚卷夜收雲氣仙掌擎秋瀉露華

天外松風吹鶴夢
珊珊珂珮隔青霞

先天觀

元陳旅

龍虎山南古澗阿
幽人住處白雲多
千林總種三珠樹
百畝曾收五色禾
丹鼎夜光迎海日
石船秋影接天河
環中異趣知誰會
我欲窮源過碧蘿

縣圃為上清周道士賦

元納延

縣圃雲深路渺茫
神仙飛珮隔扶桑
碧桃開盡春谿漲
白鶴歸來海月涼
巖溜涓涓鳴石竇
松花細細落琴牀

明年我亦山中去
賸采瑤芝滿藥囊

寄題天台楊道士素軒

元 吳景奎

梨雲漠漠護幽扃
宴坐冥觀內景清
風露洗秋生
灝白雪霜驚
曉眩空明瓊樓奏樂霓裳冷
緱嶺吹笙鶴羽輕
窓戶玲瓏人寂寂
碧桃花下步虛聲

牧齋真人華陽道院

元 吳全節

鼇載三峰擁客查
采真訪古意無涯
雲山夜雨棠梨樹
宇宙春風棗萼花
龍洞遠分丹井水
鶴松高映赤城霞

宗師應帝光前緒仙館新開第一家

元妙觀

吳全節

榴皮書壁走龍蛇池上芭蕉又見花北闕恩承新雨露
西湖光動舊煙霞春風日長玄都樹秋水星回碧漢查
修月功成三萬戶蕊珠宮裏誦南華

冲佑萬年宮

吳全節

武夷天賜萬年宮雲隔蓬萊夢已通玉旨煌煌鐫石壁
擢歌隱隱度谿風帆歸海國春潮綠市俯星邨晚照紅

不用廣寒修月斧
奎章大筆紀成功

繁禧觀

吳全節

門前流水泛桃花
回首蓬山別一家
曾把金莖餐沆瀣
閒揮玉麈看琵琶
火存丹鼎春長好
卷掩黃庭日欲斜
心與江湖天共遠
大開瀛海駐吾槎

崇禧觀

吳全節

曲林古觀水西流
天遣皇華駟玉虯
高士遠分龍虎派
哲人久伴鳳凰遊
樓臺山色三峰曉
池館泉聲五月秋

雲案凝香浮洞府坐令和氣藹丹丘

道人延翠軒

明王恭

山水嬋娟掃黛屏清暉迢遞到柴扃雲歸獨樹天邊小
雪罷孤峰鳥外青寒蘚帶花侵卷幔野泉流葉近閒庭
浮生只解人間事未得從師種茯苓

紫虛觀

明張璪

紫虛壇上鶴成羣碧洞靈芝產石根雲引晝陰歸竹塢
水流春色出花源藥爐伏火仙留訣茶竈生煙客到門

欲就上清傳寶籙未知何日謝塵喧

宿雲開堂

明顧璘

難逢魏母彩鸞車聊試彌明石鼎茶翠羽金支雲縹緲
紫厓丹洞石嶮岬五峰黛色消晴雪萬木靈暉散晚霞
願借雙公玄鶴羽月明騎上太清家

道場紀事

明張治

黃髮真人戴玉冠身騎金虎佩蒼鸞俯窺日月行丹極
貪禮星辰拜石壇播影一庭仙掌淨鐘聲萬戶綵雲寒

朝元初罷千官下碧宇沈沈夜未闌

題林屋洞天

明僧德祥

羣山包水水包山金作芙蓉玉作環
洞裏有天通五岳山中無地著三班
白雲彷彿雞初唱碧海迢遙鶴又還
可惜桃花有凡骨年年隨浪出人間

五言絕句

題井陘雙谿李道士所居

唐岑參

五粒松花酒雙谿道士家
惟求縮却地鄉路莫教賒

宿道士觀

唐朱慶餘

堂閉仙人影空壇月露初閒聽道家子盥漱讀靈書

古仙壇

元虞集

遠山誰放燒疑是壇邊醮仙人錯下山拍手壇邊笑

毛公壇

明葛一龍

此公得道處山骨何其清草木日與習毛羽自然生

七言絕句

題朱鍊師山房

唐王昌齡

叩齒焚香出世塵
齋壇鳴磬步虛人
百花仙醞能留客
一飯胡麻度幾春

題茅山華陽洞

唐 儲光義

華陽洞口片雲飛
細雨濛濛欲濕衣
玉簫徧滿仙壇上
應是茅家兄弟歸

題蔣道士房

唐 皇甫冉

軒窓縹緲起煙霞
誦訣存思白日斜
聞道崑崙有仙籍
何時青鳥送丹砂

題張道士山居

唐秦系

盤石垂蘿即是家
回頭猶看五枝花
松間寂寂無煙火
應服朝來一片霞

望簡寂觀

唐顧況

青嶂青谿直復斜
白雞白犬到人家
仙人住在最高處
向晚春泉流白花

題葉道士山房

顧況

水邊垂柳赤欄橋
洞裏仙人碧玉簫
近得麻姑書信否

潯陽江上不通潮

題自然觀

唐
陸暢

劔閣門西第一峰
道陵成道有高蹤
行人若上升仙處
須撥白雲三四重

紫極宮齋後

唐
李羣玉

紫府空歌碧落寒
曉星寥亮月光殘
一羣白鶴高飛散
唯有松風掃石壇

遊洞靈觀

唐
陳羽

初訪西城李少君獨行深入洞天雲風吹青桂寒花落
香繞仙壇處處聞

悟真院

宋
王安石

野水縱橫漱屋除午窓殘夢鳥相呼春風日日吹香草
山北山南路欲無

題石門奉真觀

宋
劉宰

壘嶂為屏石作門陰雲漠漠雨昏昏清遊到晚不知去
要上峰頭望曉暎

馬坊冷大師清真道院

金元好問

枯蒲折葦障清灣十里風荷指顧間
安得西湖展江手亂鋪雲錦浸青山

題天壽觀清隱山房

元仇遠

紫極秋聲竹滿軒一塵飛不浣
琴樽白雲自逐秋風去
卧看君山嬾出門

題廬山太平宮

元蘇爾約蘓哈雅

山上清風山下塵碧沙流水淺如春
不知松外誰敲月

驚醒南華夢裏人

遊會仙宮

元薩都拉

霏霏涼露濕瑤臺
半夜吹簫月下來
山外春風將雨過
滿庭撩亂碧桃開

題呂城葛觀

薩都拉

呂公城下葛仙家
洞府春深鎖暮霞
過客不知天畔月
小風吹落鳳仙花

紫陽道士馮友直與余同宿菌閣次日余過元

符宮友直同僧安上人入五雲觀因以寄之

薩都拉

道人採藥出山遲
菌閣秋高襲羽衣
半夜忽聞孤鶴唳
五雲相伴一僧歸

憩奉真道院

薩都拉

落花風颺步虛聲
翠艸玄芝爛熳生
過客不知春早晚
午窓晴日睡聞鶯

春日鎮陽柳谿道院

薩都拉

城外青谿出洞門道人歸去日長曛
柳花滿地無人掃
隔水遙看是白雲

張道士山房

明 儲 巖


徙倚詩成午照餘仙家宮府半樓居
醉來也有回仙興
自擘黃柑蘸酒書

石湖小天台同陸生施生兄弟

明 王叔承

石橋流水碧生涼潭樹垂陰百尺長
一片晚霞生谷口

羽衣如在赤城梁



御定佩文齋詠物詩選卷二百三十七

欽定四庫全書

集部

御定佩文齋詠物詩選卷二百三十九

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣高 中

謄錄監生_臣帥應龍

欽定四庫全書

御定佩文齋詠物詩選卷二百三十八

仙類

四言古

飛龍篇

魏曹植

晨遊泰山雲霧窈窕忽逢二童顏色鮮好乘彼白鹿手
騎芝草我知真人長跪問道西登玉臺金樓複道授我
仙藥神皇所造教我服食還精補腦壽同金石永世難

老

五言古

長歌行

漢
關名

仙人騎白鹿，髮短耳何長。
導我上太華，攬芝獲赤幢。
來到主人門，奉藥一玉箱。
主人服此藥，身體日康強。
髮白復更黑，延年壽命長。

五遊篇

魏
曹植

九州不足步，願得凌雲翔。
逍遙八紘外，游目歷遐荒。
披

我丹霞衣襲我素霓裳華蓋芬晻藹六龍仰天驤曜靈
未移景倏忽造昊蒼闔闔啟丹扉雙闕曜朱光徘徊文
昌殿登陟太微堂上帝休西櫺羣后集東廂帶我瓊瑤
珮漱我沆瀣漿踟躕玩靈芝徙倚弄華芳王子奉仙藥
羨門進竒方服食享遐紀延壽保無疆

遊仙詩

晉郭璞

青谿千餘仞中有一道士雲生梁棟間風出窓戶裏借
問此何誰云是鬼谷子翹迹企潁陽臨河思洗耳闔闔

西南來潛波渙鱗起靈妃顧我笑粲然啟玉齒蹇修時
不存要之將誰使

其二

翡翠戲蘭苔容色更相鮮綠蘿結高林蒙龍蓋一山中
有冥寂士靜嘯撫清絃放情凌霄外嚼蕊挹飛泉赤松
臨上游駕虹乘紫煙左挹浮丘袖右拍洪崖肩借問蜉
蝣輩寧知龜鶴年

其三

暘谷吐靈曜扶桑森萬丈朱霞升東山朝日何晃朗迴
風流曲櫺幽室發逸響悠然心永懷眇爾自遐想仰思
舉雲翼延首矯玉掌嘯傲遺世羅縱情任獨往明道雖
若昧其中有妙象希賢宜勵德羨魚當結網

其四

璇臺冠崑嶺西海濱招搖瓊林籠藻映碧樹疏英翹丹
泉漂朱沫黑水鼓玄濤尋仙萬餘日今乃見子喬振髮
晞翠霞解褐被絳綃總轡臨少廣盤虬舞雲輶永借帝

鄉侶千齡共逍遙

遊仙詩

晉庾闡

叩疏鍊石髓赤松漱水玉憑煙眇封子流浪揮元俗崆峒臨北戶昆吾眇南陸層霄映紫芝潛澗汎丹菊崑崙涌五河八流縈地軸

讀山海經

晉陶潛

玉臺凌霞秀王母怡妙顏天地共俱生不知幾何年靈化無窮已館宇非一山高酣發新謠寧效俗中言

遊仙詩

齊
袁
象

羽客宴瑤宮，旌蓋乍舒設。
王子洛浦來，湘娥洞庭發。
長引逐清風，高歌送奔月。
並馭排帝闈，連吹入天闕。
萬古一方春，千霜豈二髮。

遊仙詩

齊
王
融

獻歲和風起，日出東南隅。
鳳旂亂煙道，龍駕溢雲區。
結賞自員嶠，移讌乃方壺。
金卮浮水翠，玉笋挹泉珠。
徒用霜露改，終然天地俱。

其二

湘沅有蘭芷汨吾欲南征遺珮出長浦舉袂望增城朱
霞拂綺樹白雲照金楹五芝多秀色八桂常冬榮弭節
且夷與參差聞鳳笙

昇仙篇

梁簡文帝

少室堪求道明光可學仙丹縉碧林宇綠玉黃金篇雲
車了無轍風馬詎須鞭靈桃恒可餌幾迴三千年

和竟陵王遊仙詩

梁沈約

天矯乘絳仙
螭衣方陸離
玉鑿隱雲霧
溶溶紛上馳
瑶臺風不息
赤水正漣漪
崢嶸元圃上
聊攀瓊樹枝

郭弘農璞遊仙

梁江淹

崦山多靈艸
海濱饒竒石
偃蹇尋青雲
隱淪駐精魄
道人讀丹經
方士鍊玉液
朱霞入窓牖
曜靈照空隙
傲睨摘木芝
凌波採水碧
眇然萬里遊
矯掌望煙客
永得安期術
豈愁濛汜迫

雲山讚

江淹

陰長生

陰君惜靈骨珪璧詎為寶
日夜名山側果得金丹道
憂傷永不至光顏如碧草
若渡西海時致意三青鳥

秦女

青琴既曠世綠珠亦絕羣
猶不及秦女十五乘綵雲
璧質人不見瓊光俗詎聞
願使洛靈往為我道竒芬

詠得神仙

陳陰鏗

羅浮銀是殿瀛洲玉作堂
朝遊雲暫起夕餌菊恒香
聊

持履成燕戲以石為羊洪崖與松子乘羽就周王

奉和趙王遊仙

北周

庾信

藏山還採藥有道得從師京兆陳安世成都李意期王
京傳相鶴太乙授飛龜白石香新芋青泥美熟芝山精
逢照鏡樵客值圍棋石紋如碎錦藤苗似亂絲蓬萊在
何處漢后欲遙祠

英才言聚賦得昇天行

隋

僧慧淨

馭風過閭苑控鶴下瀛洲欲採三芝秀先從千仞游駕

鳳吟虛管乘槎泛淺流頽齡一已駐方驗大椿秋

懷仙

唐王勃

鶴岑有竒徑麟洲富仙家紫泉漱珠液玄巖列丹葩常
希披塵網眇然登雲車鸞情極霄漢鳳想疲煙霞道存
蓬瀛近意愜朝市賒無為坐惆悵虛此江上華

玉真仙人辭

唐李白

玉真之仙人時往太華峰清晨鳴天鼓颺歛騰雙龍弄
電不輟手行雲本無蹤幾時入少室王母應相逢

仙谷遇毛女意知是秦宮人

唐常建

谿口水石淺泠泠明藥叢入谿雙峰峻松枯疎幽風垂
嶺枝嫋嫋翳泉花濛濛黃綠霽人目路盡心彌通盤石
橫陽崖前臨殊未窮回潭清雲影瀾漫長天空水邊一
神女千歲為玉童羽毛經漢代珠翠逃秦宮目覩神已
寓鶴飛言未終祈君青雲祕願謁黃仙翁嘗以耕玉田
龍鳴西頂中金梯與天接幾日來相逢

宿五度谿仙人得道處

常建

五度谿上花生根依兩崖二月尋片雲願宿秦人家上
見懸崖峻下見白水湍仙人彈棋處石上青蘿盤無處
求玉童翳翳惟林巒前谿遇新月聊取玉琴彈

懷尹真人

唐鮑溶

萬里壘嶂翠一心浮雲閒羽人杏花發倚樹紅瓊顏流
水杳冥外女蘿陰陰間却思人間世多故不可扳青鳥
飛難遠春雲晴不還但恐五雲車山中復有山

求仙曲

唐孟郊

仙教生為門仙宗靜為根持心若妄求服食安足論
鑿惑有靈藥餌真成本源自當出塵網馭鳳登崑崙

遊仙

唐

賈島

借得孤鶴騎高近金烏飛掬河洗老貌照月生光輝
天中鶴路直天盡鶴一息歸來不騎鶴身自有羽翼若人
無仙骨芝木無煩食

題洪厓先生像卷

元

錢選

神駕馭景颺太虛時總轡元道不可分直悟天人際羣

從皆成仙玩世不記年何當事神遊許我笑拍肩

鈞天曲

明
朱成泳

飛遊鬱羅境稽首東王公開軒臨法座置酒燕靈宮紫
雲歌玉女瓊漿酌金童揮刀麟脯細入筋鸞膏空鳳簫
聲嫋嫋鼉鼓鳴逢逢投壺起天笑吹律回春融燕罷百
神散樂闋萬舞終歸來倚餘醉憑虛馭剛風

遊仙

明
劉基

日月如過翼瞬息春已秋何不學神仙縹緲凌虛游雷

霆以為輿虹蜺以為輶清晨登閭風薄暮宿不周長嘯
曾城巔濯足翠水流俯視八極內擾擾飛蜉蝣

仙人篇

明黃肅

翩翩騎白鹿言上泰山頂俯觀浮世中不見百年影道
逢古時人綠髮被兩領授我採藥訣延年保壽命我聞
再拜跪問是何方求撫我挾我肘與我上天遊天上多
桂樹枝葉何修修折取忽盈宮馨香霏我裘何因入君
袖道路長悠悠

七言古 附長短句

巴謠歌

秦闕名

神仙得者茅初成
駕龍上昇入太清
時下玄洲戲赤城
繼世而往在我盈
帝若學之臘嘉平

王子喬

北魏高允

王少卿王少卿
超升飛龍翔天庭
遺儀景雲漢
酬光鷲電逝忽若浮
騎日月從列星
跨騰八廓踰杳冥
尋元氣出天門
窮覽有無究道根

元丹丘歌

唐
李白

元丹丘愛神仙朝飲潁水之清流暮還嵩岑之紫煙三
十六峰長周旋長周旋躡星虹身騎飛龍耳生風橫江
跨海與天通我知爾遊心無窮

神仙曲

唐
李賀

碧峰海面藏靈書上帝揀作仙人居清明笑語聞空虛
閒乘巨浪騎鯨魚春羅書字邀王母共宴紅樓最深處
鶴羽衝風過海遲不如却使青龍去猶疑王母不相許

垂霧娃鬢更傳語

玉華仙子歌

唐
李康成

紫陽仙子名玉華珠盤承露餌丹砂轉態凝情五雲裏
嬌顏千歲芙蓉花紫陽綵女矜無數遙見玉葉皆掩嫵
高堂初日不成妍落渚流風徒自憐璇階霓綺閣碧題
霜羅幕仙娥桂樹長自春王母桃花未嘗落上元夫人
賓上清深宮寂歷厭層城解珮空憐鄭交甫吹簫不逐
許飛瓊溶溶紫庭步渺渺瀛臺路蘭陵貴士謝相逢濟

北書生尚迴顧滄洲傲吏愛金丹清心迴望雲之端羽
蓋霓裳一相識傳情寫念長無極長無極永相隨攀霄
歷金闕弄影下瑤池夕宿紫府雲母帳朝餐縣圃崑崙
芝不學蘭香中道絕却教青鳥報相思

思琴高

唐
鮑溶

琴仙人得仙去萬古釣龍空有處我持曲鉤思白魚仙
谿綠淨涵空虛天釣踪跡無遺餘燒香寄影在巖樹東
禮海日雞鳴初

水仙謠

唐 溫庭筠

水客夜騎紅鯉魚，赤鸞雙鶴蓬瀛書。
輕塵不起雨新霽，萬里孤光含碧虛。
露魄冠輕見雲髮，寒絲七炷香泉咽。
夜深天碧亂山姿，光碎平波滿船月。

句曲山朝真詞

唐 陸龜蒙

九華磬答寒泉急，十絕幡搖翠微濕。
司命旂旌未下來，焚香抱簡凝神立。
殘星下照霓襟冷，缺月纔分鶴輪影。
空洞靈章發一聲，春來萬壑煙花醒。

郭忠恕夏山仙館

元吳鎮

蒼崖過雨流青玉萬朶芙蓉紅間綠松枝搖動碧簾風
蘭舟徐度回塘曲畫閣朱樓設翠綸銀牀冰簟上流蘇
美人繡倦頻來往仙侶長吟聊自娛羽扇不揮塵不到
博山麝腦香猶裊新蟬驚破北窓眠幽禽啼斷林間巧
竹煙浮翠薦龍團樹影當庭映日圓晚來兩兩尋幽客
應識谿聲六月寒圖中景物非人世如此丹青誰得似
屈指流傳四百年宣和賞識標忠恕人間何處無炎歎

火雲照耀未能消
高齋展對殊未已
一片涼颺落素綃

題劉阮天台圖

明 徐庸

白雲蒼靄迷行路
水複山重不知處
行過礪谷有人家
忽見東風萬桃樹
芳香艷態娛青春
花間得遇娉婷人
五銖衣薄捲煙霧
笑語便覺情相親
神仙雖遇終離別
千古佳名自傳說
天台山水至今存
桃源望斷空明月

五言律

觀內懷仙

唐 王勃

玉架殘書隱金壇舊跡迷牽花尋紫澗步葉下清谿瓊
漿猶類乳石髓尚如泥自能成羽翼何必仰雲梯

八仙選

王勃

柰園欣八正松巖訪九仙援蘿窺霧術攀桂俯雲阡代
北鸞驂至遼西鶴騎旋終希脫塵網連翼下芝田

遊仙

唐
王貞白

我家三島上洞戶枕波濤醉背雲屏卧誰知海日高露
香紅玉樹風綻碧蟠桃悔與神仙別思歸夢釣鼇

酬王尊師仙遊

明王英

翠水三山路微茫見十洲月臨珠斗迥雲度絳河流露
氣生鼇背簫聲出鳳樓慚無學仙分得伴赤松遊

其二

漠漠層霄外寥寥太乙居蒼龍翊飛蓋白鹿挽行車
翡翠臺樹雲霞玉洞書何因躡天路探討極元虛

其三

羽節飄搖轉霓旌汗漫遊紅光飛赤鯉紫氣度青牛月

上芙蓉館風迴蓮葉舟遙憐徐福輩入海訪瀛洲

遊仙詩

明
羅頌

幽徑赤城顛松蘿九曲連千林喧藥杵一嶂起茶煙深
竇源通海層巖樹隱天携琴就猿鶴同種玉峰田

五言排律

遊仙

唐
王績

上月芝蘭徑中巖紫翠房金壺新練乳玉釜始煎香六
局黃公術三門赤帝方吹沙聊作鳥動石試為羊緱氏

還程促瀛洲會日長誰知北巖下延首詠霓裳

緱山月夜聞王子晉吹笙

唐鍾輅

月滿緱山夜風傳子晉笙初聞盈谷遠漸聽入雲清香
異人間曲遙分鶴上情孤鸞驚欲舞萬籟寂無聲此夕
留煙駕何時返玉京惟愁音響絕曉色出都城

七言律

贈毛仙翁

唐王起

水霜肌骨稱童年羽駕何由到俗間丹竈化金留秘訣

仙宮漱玉叩元闕壺中世界青天近洞口煙霞白日閒
若許隨師去塵網願陪鸞鶴向三山

贈毛仙翁

唐沈傳師

安期何事出雲煙為把仙方與世傳只向人間稱百歲
誰知洞裏過千年青牛到日迎方朔丹竈開時共稚川
更說桃源更深處異花長占四時天

夢仙

唐項斯

昨宵魂夢到仙津得見蓬山不老人雲葉許裁成野服

玉漿教喫潤愁身
紅樓近月宜寒水
綠杏搖風占古春
次第引看行未遍
浮光牽入世間塵

穆王讌王母於九光流霞館

唐

曹唐

桑葉扶疎閉日華
穆王邀命讌流霞
霓旌著地雲初駐
金奏掀天月欲斜
歌咽細風吹粉蕊
飲餘清露濕瑤砂
不知白馬紅韁解
偷喫東田碧玉花

漢武帝將候西王母下降

曹唐

崑崙凝想最高峰
王母來乘五色龍
歌聽紫鸞猶縹緲

語來青鳥許從容
風迴水落三清月
漏苦霜傳五夜鐘
樹影悠悠花悄悄
若聞簫管是行蹤

漢武帝於宮中讌西王母

曹唐

鼇岫雲低太乙壇
武皇齋潔不勝歡
長生碧宇期親署
延壽丹泉許細看
劔珮有聲宮樹靜
星河無影禁花寒
秋風裊裊月朗朗
玉女清歌一夜闌

王遠讌麻姑蔡經宅

曹唐

好風吹樹杏花香
花下真人道姓王
大篆龍蛇隨筆札

小天星斗滿衣裳閒拋南極歸期晚笑指東溟飲興長
要喚麻姑同一醉使人沽酒向餘杭

劉阮洞中遇仙子

曹唐

天和樹色靄蒼蒼霞重嵐深路渺茫雲竇滿山無鳥雀
水聲沿澗有笙簧碧沙洞裏乾坤別紅樹枝前日月長
願得花間有人出不令仙犬吠劉郎

紫河張休真

曹唐

琪樹扶疎壓瑞煙玉皇朝客滿花前山川到處成三月

絲竹經時卽萬年樹石冥茫初縮地
杯盤狼籍未朝天
東風小飲人皆醉從聽黃龍枕水眠

夢仙

唐韓偓

紫霄宮闕五雲芝九級壇前再拜時
鶴舞鹿眠春艸遠
山高水闊夕陽遲每嗟阮肇歸何速
深羨張騫去不疑
澡練純陽功力在此心惟有玉皇知

盧鴻仙山臺榭圖

元鄧文原

仙都圍合碧雲籠洞口緋桃著雨穠
丹闕春深巢翡翠

朱扉風暖出芙蓉壺公不負三山約向子終期五岳逢
野鶴一聲山館寂倚闌長聽水淙淙

昇龍觀夜燒香印上有呂洞賓老樹精

元 薩都拉

蘭風吹動呂仙影老樹槎牙吐暮秋夜靜藥爐丹火現
月明神劍夜光浮已知浩氣無窮盡不到心灰未肯休
鐵笛一聲吹雪散碧雲飛過岳陽樓

陸探微員嶠仙游

元 吳 鎮

梅閣重重翠繞遮時時雲氣颭平沙千峰樹色藏朝雨
百道江聲送晚霞洞古數留仙子蹟谿迴深護羽人家
遨遊每憶無塵地咫尺仍堪閱歲華

盧鴻仙山臺榭

吳鎮

塵蹤何得此中游無數青山遶殿頭爐篆浮煙朝靄靄
谿雲連樹晚油油花香曲徑羣麝聚共芷平田獨鶴遊
欲識仙家真樂處一泓清瀨四山秋

夢仙

元
吳景奎

紫鸞邀夢到仙家結佩相逢萼綠華翠勺細傾千日酒
蛺蝶旌斜插五雲車飛瓊鬢影含清霧弄玉簫聲隔彩霞
杜宇無情驚覺後月痕猶在碧桃花

鍾子煉丹

明
太祖

翠微高處渺青煙知子機藏辟穀堅丹鼎鉛砂勤火候
谿雲巖谷傲松年潭龍掣電深淵底崖虎生風迥洞邊
徑已苔蒙人未履昂霄足躡斗牛天

寫韻軒

明
朱夢炎

掌籍江河誤世機幾年謫降學書癡晴窓滴露花搖席
午夜揮毫月滿帷縮得春風留鳳帶畫殘秋水照蛾眉
從今了却人間事一曲鸞簫跨虎吹

五言絕句

懷仙

唐
陸龜蒙

聞道陽都女連娟耳細長自非黃犢客不得到雲房

其二

神燭光華麗靈祛羽翼生已傳餐玉粒猶自買雲英

仙人

宋文同

頭梳三角髻餘髮散垂腰時伴秦樓女月明吹紫簫

六言絕句

雜詠

元郭翼

朝汲橘泉丹井暮耕蕙圃芝田肘後長生有訣一笑曾許相傳

七言絕句

上清詞

唐張繼

紫陽宮女捧丹砂
王母令過漢帝家
春風不肯停仙馭
却向蓬萊看杏花

尋仙

唐張籍

谿頭一徑入青崖
處處仙居隔杏花
更見峰西幽客說
雲中猶有兩三家

和州守侍郎緱山題仙廟

唐徐凝

王子緱山石殿明
白家詩句詠吹笙
安知散席人間曲
不是寥天鶴上聲

清夜憶仙宮子

唐

施肩吾

夜靜門深紫洞煙
孤行獨坐憶神仙
三清宮裏月如晝
十二瓊樓何處眠

仙翁詞

施肩吾

世間無遠可為遊
六合朝行夕已周
壇上夜深風雨靜
小仙乘月繫蒼虬

偶題

唐

杜牧

道在人間或可傳
小還輕變已多年
今來海上昇高望

不到蓬萊不是仙

贈女仙

唐趙嘏

水思雲情小鳳仙
月涵花態語如絃
不因金骨三清客
誰識吳州有洞天

朝元引

唐陳陶

帝燭熒煌下九天
蓬萊宮曉玉爐煙
無央鸞鳳隨金母
來賀薰風一萬年

小遊仙詩

唐曹唐

南斗闌珊北斗稀茅君夜著紫霞衣朝騎白鹿趨朝去
鳳押笙歌逐後飛

其二

洞裏煙霞無歇時洞中天地足金芝月明朗朗谿頭樹
白髮老人相對棋

其三

青錦縫裳綠玉璫滿身新帶五雲香閒依碧海攀鸞駕
笑就蘇君覓橘嘗

其四

八景風迴五鳳車
崑崙山上看桃花
若教使者沽春酒
須覓餘杭阿母家

其五

太乙元君昨夜過
碧雲高髻綰婆娑
手擡玉策紅於火
敲斷金鸞使唱歌

其六

碧瓦彤軒月殿開
九天花落瑞風來
玉皇欲著紅龍袞

親喚金妃下手裁

其七

絳節笙歌繞殿飛
紫皇欲到五雲歸
細腰侍女瑤花外
爭向紅房報玉妃

其八

公子閒吟八景文
花南拜別上陽君
金鞭遙指玉清路
龍影馬嘶歸五雲

其九

紅艸青林日半斜
閒乘小鳳出彤霞
略尋舊路過西國
因得水園一尺瓜

其十

青苑紅堂壓瑞雲
月明閒宴九陽君
不知昨夜誰先醉
書破明霞八幅裙

其十一

海上風來吹杏枝
崑崙山上看花時
紅龍錦韉黃金勒
不是元君不得騎

携仙錄

唐司空圖

一半晴空一半雲
遠籠仙掌日初曛
洞天有路不知處
絕頂異香難更聞

仙山

唐韓偓

一炷心香洞府開
偃松皴澀半莓苔
水清無底山如削
始有仙人跨鶴來

夢仙謠

唐王穀

前程漸覺風光好
琪花片片粘瑤草
有人遺我五色丹

一粒吞之後天老

其二

青童遞酒金觴疾列坐
紅霞神氣逸笑說留連數日間
已是人間一千日

其三

瑤臺絳節遊皆遍
異果奇花香撲面
松窗夢覺却神清
殘月林前三兩片

上清詞

唐
李九齡

新拜天官上玉都紫皇親授五靈符羣仙箇箇來相問
人世風光似此無

得仙詩

唐
楊監真

日落焚香坐醮壇庭花露濕漸更闌淨水仙童調玉液
春宵羽客化金丹

畫秦宮人

宮人字玉華秦時逃入山是
為毛女漢魏間人猶見之

宋
謝翱

結艸為衣類鶴翎初來一味服黃精宮鶯幾處銜花出
猶向山中認得聲

右丞文獻公所畫張果像

金張行中

古來人物畫為難
驚見仙公樹石間
莫把丹青名右相
太平勲業在人寰

題醉王母圖

元胡長孺

宴罷瑤池醉不任
仙人那有世人心
良工欲寫無言意
自託丹青作酒箴

郭忠恕萬松仙館圖

元吳鎮

參差琳館碧山齊
雲擁疎松望欲迷
野老忘機自來去

忽驚麋鹿各東西

郭忠恕萬松仙館圖

元黃公望

琳堂掩映萬松齊絕壑寒雲望不迷為聽水流翻破寂
輕袍重過短牆西

郭忠恕仙峰春色圖

黃公望

聞道仙家有玉樓翠厓丹壁繞芳洲尋春擬約商巖叟
一度花開十度遊

其二

仙人原自愛蓬萊
瑤草金芝次第開
款乃權歌青雀舫
逍遙響屐鳳凰臺

其三

春泉瀲灩流青玉
晚岫層層障碧雲
習靜仙居忘日月
不知誰是紫陽君

黃荃花谿仙舫圖

黃公望

花發枝頭水漲谿
仙舟猶泊武陵隄
重重樓閣仙雲卷
無數青峰出竹西

遊仙詞

元郭翼

銀流萬里海雲東只泛靈查上碧空
仙女跕歌星影裏老龍吹笛浪花中

其二

白鶴下啄瑤草青道士夜讀神農經
問之長生有寶訣授以松根千歲苓

其三

谿水流香飯熟麻洞中千樹玉桃花
金盤日日飛仙供

勅賜安期海上瓜

其四

麟洲宮殿五雲高
夜赴瑤池宴碧桃
借得仙人紅尾鳳
月中飛影拂波濤

小遊仙

元
楊維禎

日落海門吹鳳匏
須臾海水沸如炮
船頭處女來聽曲
知是洞庭千歲蛟

其二

西湖仙人蓮葉舟又見石山移海流老龍卷水青天去
小朵蓮花共上游

遊赤松

元金涓

枕石聽流夢未安碧雲羅薛古祠寒夜深鸞鶴羣仙過
人在青松月下看

仙人詞

明劉基

玉府仙人冰雪姿生來即遣侍瑤池五雲隔斷塵凡路
說著人間總不知

小遊仙

明王澤

中山千日酒初醒
却愛玄都夜景清
起坐天門吹玉笛
月中珠樹起秋聲

小遊仙

明張羽

洞口春泉漱碧沙
樓臺彷彿蔡經家
赤鸞銜得金盤子
擲向窗前樹樹花

其二

晞髮扶桑露氣新
三花樹底坐調笙
到門解說長生理

只有茅家好弟兄

其三

朝遊碧海不騎魚
鳳引霓旌鶴引車
吟得步虛誰解和
歸來閒倩少霞書

小遊仙詞

明 銜 渙

玉京侍宴返瑤池
西母金輿九鳳幃
小隊旌幢三十六
龍聲馬影隔雲飛

續遊仙詩

明 馬 洪

玉板金花閣幅箋
朝來次第散羣仙
紫皇勅遣騰真誥
第一人書第一篇

其二

玉案珠簾翡翠屏
焚香夜誦蕊珠經
月明鸞背飛瓊過
少駐花陰帶笑聽

遊仙詞

明張泰

十二瓊樓麗紫清
銀河隔座瀉秋聲
翠鸞扶起瑤臺月
人在仙家第五城

其二

海風吹縹蔚藍天山湧芙蓉月湧蓮對對凌波塵襪小
相逢多是水中仙

其三

鶴笙鸞駕隔蒼煙天上那知更有天不向九霄歌白雪
怕人知是小詩仙

其四

金闕西廂玉案前衆中誰是掌書仙欲披小券支風月

借與琅函五色牋

擬楊鐵崖小遊仙

明 王鴻儒

方壺員嶠月初生海色如銀萬頃明
一片綵雲當面墮
東華童子召飛瓊

其二

一別良常歲月賒茅君相念寄瑤華
五雲閣史無人換
猶是當年蔡少霞

小遊仙

明 桑悅

胸藏星宿是天文暗坐光騰五岳雲侵曉清都揮彩筆
欲書制誥賜茅君

其二

仙班濟濟侍宸官袖拂紅雲跨彩鸞笑約玉皇香案吏
禹餘宮裏借花看

仙居吟

明張金

尋常不到山前路洞口閒雲盡日封時有聽經童子至
不知身是石潭龍

追和張外史遊仙詩

明 余善

谿頭流水飯胡麻
曾折瑤林第一花
欲識道人藏密處
一壺天地小於瓜

御定佩文齋詠物詩選卷二百三十八